

中國地方志集成

雲南府縣志輯 ⑤⑤

雍正建水州志(二)

鳳凰出版社 ● 上海書店 ● 巴蜀書社

建水州志卷之七

名宦

立德立功代不數人蓋不惟其名惟其實也建當絕徼漢節未通迨元以後聲教漸訖召棠冠竹俎豆不祧今

天子南顧倍切懷柔蒞茲土者莫不冀其戡定輯和而嬰兒鞠之誠功德懋著則千秋食報自踵接矣志名宦

名宦列傳

元

述律杰

元帥文雅雍容居然儒者使車里以黃金采女遺之一無所受蠻酋曰入我土而不爲金婦餌者元帥一人而已

普化

以父張萬家奴至元閒征緬死事廕任臨安宣慰司同知忠厚嚴明有德政碑石存

文渭興

字文舉陝西邠陽人由進士歷臨安元江等處宣慰副都元帥興學愛民能文章有詩集陞雲南廉訪副使尋陞四川行省叅政

段文瑞

讀書奉母盡孝母歿哀毀踰禮匍匐一里外負土成墳鄉里稱嘆事聞旌表曰孝義之門授本路學正除中慶路儒學副提舉陞本路通判又陞臨安

路總管卒於兵閒

張道立

臨安軍民宣撫使創學廟於建水書清白之行於公廨以警貪墨風化大行

王昇

字彥高昆明人資性聰慧始由中慶學正擢臨安宣慰司都事屢著宣績陞曲靖宣慰司副使文章政事名於南詔居喪執禮有文集若

干卷

明

萬中

詳勳業

金朝興

宣寧侯

王執

寧州衛

指揮

洪武十四年冬王師平雲南十五年正月朝興帥師至臨安元分
省右丞伍友歸款遂城臨安建置府衛命萬中王執等留兵鎮之
明年秋七月所在皆叛中謂執曰吾爲諸將守諸將爲吾出戰何
憂於賊時石屏知州馬黑奴搆煽諸部叛連兵屯海東去府四十
里列營七合諸部來攻城執等率師乘夜破之追至異龍湖又破
之馬黑奴逸蠻潰師還擊其所部於西山於楊州莊皆大破之由
是臨安軍勢大振賊不敢動未幾寧州土酋長吉台糾元江曲江
通海馬合謨連兵四萬圍通海守將陳鏞王才嬰城固守踰月音
問始通又選銳將千人閒道夜往救之登秀山張旗幟鳴鼓角
發銃炮城中知救至出兵夾擊蠻遂大破解圍走諸郡悉平

許

莘

字師尹大名人治瑞州鞏昌皆有聲洪武閒左遷本府通判優於儒術首建府學育養人才後之彬彬蔚起者實於此

陳

禮

字正言江西泰和人永樂閒由進士任知府行政利人修舉廢墜凡公署祠宇多賴新之

李

善

河南人永樂閒任本州知州公勤惠愛人甚德之

賴

瑛

江西人正統閒任本府知府有惠政建藏書閣購經史諸書以便諸生誦讀尋陞布政司叅政

徐文振

字聲遠四川威遠縣人正統閒先任本府同知善字其民任滿當去民上疏乞留遂進本府知府

邵

鑑

直隸壽州人任臨安衛左所百戶正統六年征上江刀招罕寨力戰死於陣子衡廕陞任中所正千戶

彭善道

浙江人正統閒任本府通判興學校撫漢彝綽有治聲後陞工部郎中

劉文

山西大同進士天順閒任通政左遷本府同知端謹有爲尤長文學蒞任三年詔復舊職

李璧

字白夫廣西武緣舉人任本府同知有學有守
在任三年修府治惇禮樂陞南京戶部員外郎

何純

字惟一江西新淦進士成化十五年任兵備副使立哨堡嚴守備
法度明肅盜賊屏息親爲諸生解經書校文字批評點竄成就頗
多公由庶常改御史丰采

凜然遷臨安兵憲卒於官

左明善

字復初四川富順縣進士成化閒任知府有爲有
守吏民畏愛交人常犯邊公揭榜諭以禍福賊退

周瑛

字廷潤貴州興隆進士成化閒由刑部員外郎歷知
府革弊剔姦士民忻戴歷任苑馬寺卿廣東布政

周希旦

四川廣安舉人成化二年
任本州知州百事修舉

趙子禧

字慶夫雲南鶴慶舉人成化閒任府學訓導以身爲教工草隸有碧簑稿蟲鳴四蟲傳述古博洽後陞南陽同知

楊奇

江西王安舉人成化閒任教授存心仁厚誨人不倦

曹安

字以寧江南華亭舉人成化閒任訓導經學精明多所造就

江魚

字惟化江西豐城舉人任本府推官文治聿興河底勘事中毒而殞人甚惜之

王一言

字行之四川內江進士弘治十二年任兵備副使修城池增軍積糧公署學校恢擴一新清查餘丁差用減省設應捕官兵追捕賊

盜地方寧靖屬下凜然無敢欺者歷陞僉都御史

朱疏

字德嘉四川瀘州進士正德十四年任知府性明敏操守嚴正遠近畏服撲捕賊盜地方寧靖

陳允諧

福建莆田舉人正德閒任知州惜民省費境內食德

汪金

字汝礪江西貴溪進士嘉靖元年知府性純謹肅綱紀創置學田士民賴焉陞浙江憲副

李孟陞

字時泰河南睢州人弘治間兵備臨安副使駐節八年教養備至修學宮置樂器聚生徒講明義理士風丕振陞陝西按察使

鮑象賢

字復之江南歙縣人嘉靖間兵備副使裕達練事畫安南之役功尤偉陞巡撫

蔣宗魯

字道父貴州普安人嘉靖間兵備副使以權宜調劑精明嚴毅弭盜愛民討平元江叛逆一方奠定後陞巡撫

楊守魯

字允德湖廣長沙人嘉靖間臨元分巡副使討鳳繼祖功尤著調提學

王續之

字大卿四川南充人萬歷三年任叅政分守臨元長材豁度念嗣人採山之苦悉除遠年逋課民困蘇息

李先著

山東人萬歷二十五年以叅政分守臨元道不染不撓後以猛廷瑞事被逮死於獄滇人爲之流涕

許宗鑑

字應衡福建晉江人萬歷二十七年任兵備副使兵火之後與民休息興學校修河堤辨冤獄禁刁訟置學田椿柞田膏火有資潯河有費臨人

至今賴之

漆文昌

號封溪江西人萬歷二十七年任兵備副使興賢禮士勤政愛民理屯田清水利悉中機宜軍民兩賴先任永昌撫彝同知緬酋連年入寇猛哈思化皆助之時議欲加兵公執不可巡撫蕭彥從之令文昌往撫乃單騎入壘宣朝廷德意諸彝素服咸稽首聽命不敢內窺者垂數十年永

騰之人至今尸祝焉

陳洙

字伯訓福建長樂人萬歷間任提學副使校士公明一塵不染正文體作士氣十八郡人士服教畏神者久而不忘晉參藩橐中無

甘文獻
餘物惟圖

書數卷

陳夢樓

福建舉人嘉靖年知州精明果斷吏斂手其他寬政尤多

蔡煥

同安進士嘉靖年任知府明練寬和覲旋乞歸郡人仰德

錢邦偁

薪水進士嘉靖末任知府慈恕得民歲儉設粥以濟饑好審理詞訟片言立決自捐俸以補項兩人覲除却一切陋例陞苑馬寺卿

昌應時

字廷佐莆田進士萬歷三年任知府性坦直不事趨承時集臨元諸生評隲文藝藻鑒不爽士林仰之

林裕暘

福建晉江人萬歷間任知府尚溝慎恬介綽有惠政

牛可麟

祥符人萬歷十二年任知府秉性樸直政尚寬和訟斷一成確不可易常書學古循良四字懸之堂以自期待云

楊浚

南充舉人萬歷間任府同知分猷贊理靡不盡心攝邑篆溫惠天成所至見思

汪文璧

南城貢生萬歷間任知州寬厚直方稱循良吏

王鎮

貴州清平人天啟間任知府平獄訟練鄉兵實心實政臨人戴之

熊啓宇

字六開江西南昌人崇禎特用臨安府推官屢遷副使居官廉惠歷著政聲丁亥流賊攻臨城破宇被執罵賊不屈賊義釋之賊屠城橫尸二十餘萬宇率殘民收瘞爲三大塚後民饑乏食設法賑粥者兩月全活甚衆士民感德祠祀之

國朝

甘文焜

遼東人以兵部尙書總督雲貴勤政愛民康熙七年任值逆藩吳三桂之變殉節死鎮遠謚忠果

趙良棟

陝西寧夏人以勇略將軍總督雲貴
康熙二十年任材兼優剛柔並濟當

蔡毓榮

奉天錦縣人以綏遠將軍總督雲貴康熙二十一年任文武兼
優剛柔並濟當吳逆鳴張之始扼要荆襄削平僭亂綏靖瘡痍

范承勳

遼東瀋陽人總督雲貴康熙二十五年任
世篤忠貞才擅文武恩垂邊徼兵民共戴

石文晟

鑲藍旗人雲南巡撫康熙三十二年任
政善恩洽若疏減屯賦廣解額尤最者

郭 璫

滿洲人雲南巡撫陞總督雲貴康熙四十八
年任綏輯邊壤拊循軍民兩任悉有政績

陳必成

字德子浙江山陰進士以部郎擢雲南提學僉事康熙十年任理
學淵博公正無私兩迤單寒拔取殆盡修學宮表節孝獎行優文

李興元

體士風蒸
然不變

李興元

康熙十二年任雲南按察使守法不阿逆藩之變公慷慨不屈幽之數載竟爲所害

謝于道

字敏公號存義浙江鄞縣人康熙癸丑進士由庶常歷官刑部郎中康熙二十七年欽差雲南提學文風翕然不變考校時批答

馳驟如風雨鑒定甲乙皆出

親裁暗中摸索盡知名士

張文勇

號飛熊陝西洋縣人順治十五年隨大帥拓渾以經略右標提督鎮守臨安賞罰嚴明兵卒畏服會元江復叛各土司搖惑勇單騎人其境慰之遂定勸農重粟興賢下士陞通省提督調甘肅提督及吳逆之亂全陝震動勇獨守忠義累建大功授靖逆將軍靖逆侯奉諭

襄壯

馬山

字忠橋遼東人康熙二十年任臨元激江鎮總兵忠直鎮靜時當恢復之初兵民兩困野寇侵擾乃加意撫綏優禮紳士嚴懲奸宄

一時兵民安堵遠近懷服

張其蘊

陝西番衛人臨元鎮總兵康熙四十七年任識量涵雅有儒將風捐俸積穀濟窮備荒澤留營伍

盧化龍

號龍門遼東人康熙四十七年任知府天性和厚興學重文時野賊仇殺士日禍及彝民請於上官遣兵出納樓邊境力鋤醜類靖寇安民

閻璋

號念齋遼東人康熙四十二年任知州禁革雜派聽斷明決人不敢干以私

謝于道

字存莪浙江人進士康熙二十五年任提學時滇南聲教雖通積習未除于道以宗匠特衡破格造士每試召諸生面教之賞拔盡知名士自是滇南

文風彬彬稱盛

魏方泰

字魯峯江西人進士康熙四十五年由檢討任督學操潔守廉衡平鑑正絕苞苴拔單寒文風丕振教條俱勒石學宮

未經入祀附

張玉樹

字德潤陝西人進士由山東濟寧州擢臨安太守甫下車首以宣講

聖諭爲化民之本次則修

黌宮復泮池舊制擴新關帝廟貌於城隍厲壇黃龍等廟及董莊愍祠考棚坐號以石易木俱次第興修振作書院清理鄉會試卷金原委義倉積弊修河堤革夫役平錢政抑米價諸善舉士民均沾實惠性清廉不受餽勤於聽訟審斷如神暇則潛心理學儒書名人著述年六十卒於官臨人悲號送櫬歸陝

鄉賢

人才之生不擇於地無間於時要期克自振拔表見不虛而已

國家鄉賢之祠與名宦竝重豈非國僑遺愛原本東里慈明兄弟婉跡高陽也哉建雖彈丸地豈無功在當世澤及生民志存獨善型堪範俗者生前既已評高月旦歿後自宜俎豆宮牆表厥芳徽用彰攸好志鄉賢

明

張隆事詳人物